




BIBLIOTHECA  
VNI<sup>VER</sup>SITATIS  
CRACOVENSIS

39048

Mag. St. O



Biblioteka Jagiellońska




stdr0002073



39048

I









39048

I


P

Magist. Bernardini: Assertiones

Theologicæ ex toto quarto libro  
sententiarum J. Joannis Duns Scoti.

Feol. 2476







ASSERTIONES  
THEOLOGICAE:  
EX TOTO QVARTO  
LIBRO SENTENTIARVM,

F. IOANNIS DVNS SCOTI, DOCTO-  
ris Subti. in Ecclesia S. Bernardini  
Conuentus Cracouiensis Fratrum  
Minorum de Obseruantia publi-  
cè ad disputandum pro-  
positæ.



*Disputabuntur Mense Februario, Die 24 Hora 19  
obiectis satisfaciente F. Bernardino Bidgostino, sub auspi-  
cijs R. P. F. Petri Posnaniensis, Lectoris  
Generalis, S. T.*

CRACOVIAE  
Ex Officina NICOLAI Lobij. Anno Dñi 1608.



Florete flores, quasi lilium, & date odorem, & frondate  
in gratiam, & collaudate canticum, & benedicite Domi-  
num in operibus suis. Ecclesiastici 39.

K 177 10/168

kal. wisniew



*Quis neget esse tuam claro de sanguine gentem,  
Florida conspicuum cui rosa stemma dedit?  
Quis carpet de stirpe rosas, quis sumet odorem,  
Nî tibi sit mentis candor odorq; Dei?*

390 487



# ILLVSTRISSIMO

AC REVERENDIS: DOMINO,

## DOMINO MATHIAE

### PSTROKONSKI,

EPISCOPO PRÆMYSLIENSI,

SUPREMO CANCELLARIO

REGNI POLONIE.

F. BERNARDINVS BIDGOSTINVS ORDINIS MINORVM  
de Obseruantia Professus. S. P. D.



*I homines vellent corporum suorum, & tranquillitatis vitæ (quæ sine secunda valetudine nullatenus haberi potest) curam gerere Præsul amplissime, faterentur utiq; medicinam præstare omnibus condimentis, & mortalibus summè necessariam esse: quia ut quidam Sapientum rectè ait, Deo Maximo inquit primò gratia agenda sunt, qui nobis vitam largitus est; deinde medicinis, quæ eandem ne tam facilè in periculum delabatur, vel delapsa prorsus intereat, tuentur ac defendunt. Quod cum ita sit, profectò non incongruè aliquis, qui ad intuendum cælestis patriæ felicitatem, & nunquam peritura vitæ securitatem, depulsis vittorum squaloribus, mentis suæ aciem conuerteret, idipsum diceret, ac sentiret, præsertim, si Sacramenta nouæ legis, medicinam salutarem esse, apprimè lapsis necessariam, & antidota quadè æternæ felicitatis agnosceret. Et iurè quidem, cum illa tantum animorum salutem medeantur, quantum nec certiùs nec velociùs quidpiam corporalium medicinarum corporibus prodesse potest, vel solet. Nec mirum, quid enim est medicina corporalis in radicum ac florum temperamentis consistens, in comparatione remedium, quæ de fontibus Saluatoris profluunt ac emanant? inspiciat quisq; finem, consideret efficaciam; trutinnet modum, profectò ipsa re clarè attestante, in hoc ne unguem vel minimum, ab æqua lance*



lance recti iudicij deuiabit; si ea præstantissima ac efficacissima omnium  
vulnerum ac infirmitatum animæ remedia, quæ totam naturam huma-  
nam dissolutam ad debitam harmoniam, & proportionem reducunt, iudi-  
cauerit. Hoc ego non ita pridem admiratus, cum id ipsum quod laboriosa  
industria peperit, priuatis claudere penetralibus nequaquam esse censere,  
in publicum prodire, & tanquam merces labore proprio comparatas, hos  
diuina liberalitatis in genus humanum præstantissimos thesauros patefa-  
cere constitui. Quod opus cum aggredere, & diligentissimè considera-  
rem, sub cuius munimine & protectione illud proderem, tu primus Præ-  
sul dignissimè occurristi, (de quo nedum præclarum ouile tuum, & uni-  
uersa Respublica, sapientia tua eximia, scientia, ac dexteritate suffulta  
gloriatur, sed etiã nostra Religio de tuo vel maximè singulari patrocinio  
gaudet) vt tibi saltem hoc exile studij nostri Theologici munusculum, cū  
aliud non suppetat, in gratiarum actionem, tua humanissima erga no-  
stram Religionem beneuolentia, ac liberalissima munificentia, offerrem  
ac dicarem. Accipe igitur Præsul meritissime, hilari fronte, hoc gra-  
ti animi nostri, erga te testimonium, & Religioni nostræ tuis præsidys con-  
fidenti, patrocinari non desistas. Vale.





# ASSERTIONES THEOLOGICAE:



## DE SACRAMENTIS in communi.

### I.



Sacramentalem gratiam tanquam formam excellentissimam, & nobilissimam, qua dignè recipientes Sacramenta à Deo exorantur, nulla creatura quantumcunq; perfectà, à materia abstracta, & à Deo ad supernaturalem rerum ordinem eleuata, etiam per absolutam Dei potentiam producere potest, siue dependenter, siue independenter à causa prima, siue per formam intrinsecam, siue per formam ab extrinseco, sibi comunicatam & impressam agat, vel agere possit.

### II.

Potissima huius impossibilitatis causa est, quia talis gratia, cùm sit qualitas supernaturalis, superans naturam & vires naturales, sola actione creatura producit, & nullo modo ex potentia naturali vel obedientiali animæ educitur; nulla autè creatura quantumcunq; perfectà, potest habere actionem aliquam respectu termini creationis, tanquam causa principalis, excludens omnem causam superiorem agentem.

### III.

Nulla etiam creatura potest in terminum creationis per formam propriam intrinsecam, vel ab extrinseco sibi communicatam, esto in sua actione præsupponat superius agens; non propter aliquem modum se tenentem ex parte creaturæ, aut infinitatem termini à quo, vel ad quem ipsius creationis & distantie, quæ inter eos habetur, sed propter modum creandi tenentem se ex parte creantis.

### IV.

Non solum ut causa principalis, verum nec ut causa minus principalis, to-



## ASSERTIONES

lis, totalis vel partialis, aut instrumentalis physica, potest Sacramentum, vel alia quæcunq; causa secunda producere gratiam Sacramentalem, aut vnionem ipsius gratiæ cum subiecto: neq; tamen Sacramenta solum significant, aut vt conditiones, sine quibus non, causant ipsam gratiam: sed vt verè causæ instrumentales, morales tamen, non physicae.

### V.

Ponere & asserere aliquam virtutem supernaturalem, quæ sit forma realis & absoluta permanens, vel successiua intrinsecè inherens ipsi Sacramentis, nec est possibile, nec necessarium. Neq; tamen omnis omnino virtus est tollenda à Sacramentis, sed est illis concedenda virtus moralis, ratione cuius Sacramenta continent, & causant gratiam Sacramentalem.

### VI.

Sacramentum in communi, non solum definitione dicente quid nominis, sed etiam alia longè perfectiori dicente quid rei extra animam, definiri potest, & rectè definitur hoc modo: Sacramentum est signum sensibile, gratiam Dei ex institutione diuina efficaciter significans, ordinatum ad salutem hominis viatoris; Neq; tamen illa definitio Magistrum Sententiarum: (Sacramentum est inuisibilis gratiæ visibilis forma,) vt imperfecta reiicienda est, si ei, quæ desunt addantur, & ipsa definitio suppleatur.

### VII.

De ratione Sacramenti genericè sumpti, est esse signum rei sacræ, non tamen omnia signa rei sacræ, censenda sunt propriè Sacramenta. Est autem de ratione Sacramenti esse signum rei sacræ, tam ex parte rei significantis, quàm ex parte rei significatæ: quare formalis ratio Sacramenti constituitur, ex ratione signi demonstratiui moraliter, & ex ratione efficacis, ratio tamen signi se habet ad Sacramentum vt generica, ratio verò efficacis, vt specifica.

### VIII.

Sacramenta sunt de facto instituta, nulla tamen erat necessitas simpliciter ea instituendi, ex parte Dei vel effectus inuisibilis: Sunt autem instituta à solo Deo immediatè, vel à Christo, vt Deo & homine, quo ad rationem completam, & perfectam Sacramenti: poterant tamen institui ab aliqua creatura, ex commissione diuina, quoad determinationem signi &



gni, & rationem genericam, nullo verò modo quoad rationem completam & specificam.

## IX.

In statu innocentix vel in statu patrix & beatitudinis cœlestis, ubi nullum est vel fuit peccatum, nullum erat instituendum Sacramentum propriè dictum, ut remedium vel auxilium : post lapsum verò pro tempore alterius, & alterius legis erat congruum instituere, alia & alia simpliciter Sacramenta, quantum ad sensibilia significantia, quantum verò ad significationem gratix, alia & alia secundum quid.

## X.

In statu legis naturæ fuit aliquod Sacramentum propriè dictum, per quod paruulis peccatum originale remittebatur. Illud autem non fuit sola fides, sed fides verbo vel facto aliquo protestata & explicata, etiam respectu paruulorum, respectu verò adultorum, probabile est fuisse aliquod Sacramentum, vel Sacrificium institutum, quod haberet rationem Sacramenti propriè dicti.

## XI.

In statu legis scriptæ, Sacramenta, si cum gratix dispositione, & fide seu quocunq; alio bono liberi arbitrij motu recipiebantur, erant gratix & gloriæ ex opere operantis meritoria. Nullum tamen Sacramentum, quod erat præcise illius legis, ex opere operato gratiam conferebat, sed tantum ex opere operâti, & bono motu recipientis vel ministrantis Sacramentum.

## XII.

Circumcisio ex vi Circumcisionis, tollebat à paruulis & adultis peccatum originale, conferendo ipsis non tantum ex opere operantis, sed etiam ex opere operato gratiam. Et quamvis de potentia absoluta, posset Deus delere culpam originalem sicut & actualement, absq; vlla gratix infusione, tamen secundum potentix ordinatæ modum, culpa originalis, vel aliquod aliud peccatum mortale, non dimittitur sine gratix infusione.

## XIII.

In statu legis novæ, septennario Sacramenta continentur numero, quibus ut auxilijs & adiutorijs, ad gratiam solus Deus legem Evangelicâ, tanquam perfectissimam, quam Trinitas disposuit, dare homini pro statu



viæ, adornauit. Et propterea Sacraméta legis nouæ, sunt longè perfectiora, & quoad intensionem, & quoad extensionem veteris legis, Sacramentis. Hanc autem perfectionem & efficaciam habent à passione Christi, vel Christo patiente, tanquam à causa meritoria, à Deo verò, vt à causa principali agente.

## DE BAPTISMO ET CONFIRMATIONE.

### XIV.

**B**aptismus seu Sacramentum baptismi, est Sacramentum ablutionis animæ à peccatis, consistens in ablutione hominis aliquo modo consentientis, facta in aqua, ab alio ablutente, & in verbis certis simul, ab eodem ablutente, cum debita intentione prolatis. Ad hanc definitionem est reuocanda illa à Magistro proposita: Baptismus est tinctio corporis exterior facta, sub forma verborum præscripta.

### XV.

Propriè loquendo de forma, vt est altera pars compositi, forma Sacramenti huius est ipsa relatio signi, qua formaliter est tale Sacramentum, cuius totale fundamentum, est sola materia, ita, vt eam nihil aliud fundet, vt totum fundamentum vel pars fundamenti, licet etiam alia concomitantia prærequirantur. Vt verò verba dicuntur esse priora & actualiora ipsa materia, sunt per quandam similitudinem forma, ablutio autem vt posterior & actuabilis est materia.

### XVI.

Forma quæ consistit in verbis, alia est necessaria Ministro, alia est necessaria necessitate Sacramenti. Illa est necessaria Ministro, qua Minister Ecclesiæ Romanæ, vti debet ministrando, vt licitè & dignè ministret. Illa autem est necessaria necessitate Sacramenti, sine qua validè Sacramentum non conficitur, & propterea requiritur necessario, vt essentialè ipsius formæ, inuocatio Sanctissimæ Trinitatis, verbis explicitis & distinctis expressa.



## XVII.

Nomina significantia proprietates, & non personas vel personalitates, & nomina Sanctissimam Trinitatem implicite continentia, non valide ad formam Baptismi adhibentur, & ideo forma à Christo præscripta utendum est, cui si aliquid repugnans, vel diminuens addatur, nihil fit; si verò illa eadem forma varietur, secundum congruitatem terminationis accidentalis, validum est Sacramentum, quando talis variatio, non tollit conceptum, per verba significatum.

## XVIII.

Sola aqua naturalis, pura, est materia remota Baptismi, aquæ verò artificiales illæ, quæ communiter dicuntur artificiales, & sunt corpora quædã mixta, cū non sint aquæ nisi æquiuocè, nullo modo sunt aptæ pro materia huius Sacramenti. Puratandè debet esse aqua, opposita impuritati & mixtioni, nō solū per iuxta positionē, sed etiā per alterationē alterantē à specie. Materia verò proxima huius Sacramenti, est ipsa ablutio visibilis

## XIX.

Institutio Baptismi præcessit promulgationem eiusdem, ex vi tamen institutionis, non obligabat antequam promulgaretur; cuius promulgationis fuerunt duo tempora: vnum, per modum consilij, à principio promulgationis Euangelij, vsq; ad diem Pentecosthes; secundū, per modum præcepti, quod incepit à die Pentecosthes. Circumcisionis verò quatuor assignantur tempora, quæ etiam post Baptisimum promulgatum sub præcepto, cum alijs legalibus euacuata fuit.

## XX.

Post Baptisimum promulgatum per modum præcepti, quilibet qualitercunq; iustificatus, qui non impleuit illud præceptum, & cum quo Deus non dispensauit specialiter, tenetur ad Baptisimum affectu, & pro tempore & loco effectū. Cuilibet autem dignè recipienti æqualiter Baptismus ex ratione sua confert gratiam, quamuis aliundè, in Baptismo, maiorem vel minorem ab vno quàm ab alio, posse recipi gratiam non sit negandum.

## XXI.

Paruuli sunt Baptizandi, recipiuntq; effectum Baptismi, qui si secundum omnes partes corporis sunt in vtero matrum, non possunt Baptizari;



si verò secundum aliquam partem principalem, vel minùs principalem animatam, apparent extra vterum, sunt Baptizandi, & recipiunt effectum Baptismi. Idem sit iudicium de paruulo exposito, cum quo si inueniatur certa signa, quod sit Baptizatus, non est Baptizandus; secus autem si non inueniantur.

## XXII.

Iudæorum & aliorum infidelium paruulos, princeps ille cui in regimine Reipublicæ subditi sunt, etiam inuitis eorum parentibus (modò illis prouideat post Baptismum de Christiana educatione) Baptizare potest: imò religiosè & Christianè fieret, si etiam ipsi parentes cogerentur minis & terroribus, ad suscipiendum Baptismum, & ad conseruandum susceptum.

## XXIII.

Adultus qui non vtitur nuncratione, nec vsus est vnquam, Baptizandus est, vel si speratur aliquando illum ratione vsurum, tempus illud expectandum est; si verò non vtitur nunc ratione, sed aliquando vsus est, tunc supponitur nunc habitualiter consentiens vel dissentiens, secundum quod se habuit in sanitate, antè istud impedimentum immediatè.

## XXIV.

Quod si etiam adultus vtatur nunc ratione, & dissentit nunc, contrariè & simpliciter, consentit verò secundum quid, non recipit validè Baptismum; si verò tantum negatiuè dissentiat, sed virtualiter & habitualiter consentiat recipit verè Sacramentum.

## XXV.

Ad hoc vt validè Baptismus suscipiatur ab adultis, requiritur in ipsis voluntas & intentio suscipiendi Baptismum, vt est cæremonia à Christo instituta, in adultis quidem ratione vtentibus, saltem virtualis vel habitualis; in non vtentibus verò ratione, qui aliquando ea vtebantur, sufficit habitualis; sed in his qui ne habuerunt rationis vsum, nec nunc ratione vtuntur, nec habitualis, nec virtualis voluntas vel intentio requiritur.

## XXVI.

Vt autem non tantum validè, sed etiam rectè & absq; peccato Baptismus suscipiatur ab adultis, requiritur præter voluntatem & intentionem

## THEOLOGICÆ.

7.

onem suscipiendi Baptismum, omnis impedimenti ac fictionis remotio, & ultra hoc recta fides & debita saltem per attritionē, ad gratiam dispositio. Non sufficit autem ad recipiendā gratiam Baptisimalem & salutem, virtute huius Sacramenti, solus animus recipiendi Sacramentum, etiam cum carentia ipsius affectus actualis aut virtualis ad peccatum.

### XXVII.

Licet characterem, ex Baptismo inesse animæ non possit probari per naturalem rationem, experientiam, & auctoritates Sanctorum euidentem, debet tamen poni, propter auctoritatem Ecclesiæ. Est autem character signum spirituale & indelebile, ratione cuius potest quis recipere vel ministrare Sacramenta, qui in tribus duntaxat imprimitur Sacramentis: Baptismo, Confirmatione, & Ordine.

### XXVIII.

Subiectum characteris non est intellectus, vel animæ essentia, sed potentia volitiva, sicut & gratiæ, ad quam illa supernaturalis forma ex ordinatione diuina disponit, vt forma imperfectior ad perfectiorem; differt autem character iste ab alijs seipso formaliter, extrinsecè verò per differentiam & distinctionem, à distinctis Sacramentis desumptam.

### XXIX.

Minister siue Hæreticus, siue Schismaticus, siue etiam in peccato existens, si intendat facere quod facit Ecclesia, & seruet modum Ecclesiæ, verè confert Baptismum, si non obstat malitia recipientis. Recipiens verò Baptismum à præciso ab Ecclesia, vel offerens illi paruulum Baptizandum, si non adsit alius, nec sit possibile habere alium, non peccat. A non præciso etiam ab Ecclesia sed permisso, si est occultus peccator, potest Baptismum recipere, semper tamen meliorem, vel cui ex officio incumbit conferre Sacramentum, alijs præferre debet.

### XXX.

Cum periculo vitæ corporalis paruuli suscipientis Baptismum, nulus debet Baptizare, & hoc si sint certa signa de morte ei per hoc inferenda vel acceleranda; si tamen non sint signa certa, sed leuia & irrationabilia, quæ ex erronea procedunt conscientia, & non adsit alius qui possit Baptizare, Baptizare potest, conscientia erronea depolita: stante vero conscientia illa erronea Baptizare non debet.

### XXXI.



## XXXI.

Quodcunq; suppositum intellectuale, quod potest abluere per motionem corporis ad aquam, & proferre verba, & habere intentionem debitam, potest Baptizare; congruum tamen est id à viatore fieri, & ab eo magis, qui maiorem in Ecclesia auctoritatem habet, ita, vt solus Sacerdos sit ordinarius huius Sacramenti Minister. Laici verò tantum tempore necessitatis, seruato tamen inter se ordine dignitatis, Baptizare debent.

## XXXII.

Quamuis etiam vniuersaliter congruum sit ab homine viatore conferri hoc Sacramentum, & non ab Angelo: si tamen Angelus bonus Baptizaret in corpore assumpto, imò & malus, & constaret per reuelationem, vel quocunq; alio modo certo, hoc eum fecisse ex præcepto Dei, esset validum Sacramentum, nec Baptizatus esset de nouo Baptizandus, sed sine certa super hoc reuelatione credendū ei non esset, quod verè Baptizaret.

## XXXIII.

Vnus plures, & plures vnū verba proferendo & abluendo, Baptizare possunt; non verò aliquid seorsim & non totum faciendo, & hoc si illi plures sint manifestè distincti; si verò Baptizandos, plures esse nō sit manifestum, expectetur tempus discretionis, in quo per actum intellectus & voluntatis supposita discernantur, & tunc sigillatim Baptizentur, si distincta supposita esse constet; sin minus, tunc in partibus principalibus, ad vnum pertinentibus, abluantur, cum forma verborum præscripta.

## XXXIV.

Simultas ad ablutionem & prolationem verborum est necessaria, talis qualis requiritur in actibus humanis, vt scilicet incipiat vnum antequā finiatur aliud, secundum æstimationem & iudicium morale; indicatur autem simultas inter factum hominis & verbum, quando incipit vnum antequam totaliter finiatur aliud.

## XXXV.

Baptizans debet esse distinctus supposito à Baptizato, neq; idem se ipsum Baptizare potest. Ad validam etiam huius Sacramenti collationē, requiritur in Ministro conferente & Baptizante intentio, & respectu actus, & respectu finis, formalis vel virtualis, respectu verò finis proximi vel in

vel in particulari, vel in vniuersali, nūquā autē sufficit habitualis intentio

## XXXVI.

Sacramentum Baptismi non est iterabile, etsi iteretur de facto, non habet effectum suum, cuius causa & ratio non est alia nisi volūtas diuina, instituens Baptismum initerabilem; neq; Baptizantem pluries vnum, vel suscipientem pluries Baptismum, siue publicē, siue priuatim, vllō modo exculat à grauissima culpa & pœna ignorantia iuris.

## XXXVII.

Confirmatio seu Sacramentum Confirmationis, est vnctio hominis viatoris, aliquo modo consentientis, vel libero arbitrio nunquam vsi, facta in fronte, in figura Crucis, cum chrismate Sanctificato, & hoc à Ministro idoneo, simul cum intentione debita inungente, & verba certa proferente, significans efficaciter ex institutione diuina, vnctionem animæ per gratiam roborantem, ad confitendum cum constantia fidem Christi.

## XXXVIII.

Minister Sacramenti Confirmationis, est solus Episcopus, & non simplex Sacerdos. Materia est oleum balsamo mixtum, & ab Episcopo benedictum: forma verò est illa, quæ his exprimitur verbis: **Signo te signo crucis, & consigno te chrismate Salutis.** Suscipiens est solus Baptizatus, & adultus, eius effectus est augere gratiam, hominē roborare, & in fide charitate formata, firmare.

DE SACRAMENTO EV-  
charistiæ.

## XXXIX.

**E**ucharistia, quæ est bona gratia conferens refectionem animæ spirituales, est præstantissimum nouæ legis Sacramentum, Corporis Christi & Sanguinis veraciter contenti, sub speciebus panis & vini, post consecrationem factam à Sacerdote, sub verbis certis, cum debita intentione



tentione prolatis, ex institutione diuina, veraciter signans Corpus Christi Domini, & Sanguinem sub eisdem speciebus realiter contineri.

## XL.

In hoc Sacramento, sicut est vna consecratio, vnitae integritatis, nõ verò indiuisibilitatis, sic etiam est vna forma consecrationis vnitae integritatis, non indiuisibilitatis, continens in se plures formas partiales, corporis scilicet & sanguinis. Corporis quidem hæc est, & non alia forma. (Hoc est enim corpus meum) in qua coniunctio (Enim) ponitur propter connexionem, reliqua verò verba, quæ præcedunt & sequuntur formam, non sunt de necessitate Sacramenti, requiruntur tamen ad hoc necessariò, vt verba Sacramentalia, ex vi verborum significant illud, quod efficitur ex vi Sacramenti.

## XLI.

De forma Consecrationis Sanguinis, non est nobis certitudinaliter traditum; an reliqua verba, vltra illa essentialia (Hic est enim calix Sanguinis mei) vsq; ad illud (vnde & memores nos) sint de necessitate Sacramenti: quilibet tamen Sacerdos illa proferre distinet, & cum deuotione tenetur: De illis autem, (hoc facite in meam commemorationem) certum est, quod non pertinent ad essentiam formæ, sed ad præceptum de vsu Consecrationis.

## XLII.

In forma Consecrationis Eucharistiæ illud pronomen (HOC) demonstrat pro vltimo instanti completæ prolationis singulare entis, non autem alicuius minùs vniuersalis, & hoc ex determinatione, non ex vi vocis. & licet pronomen (HOC) non supponat per se, nisi singulare entis, tamen intelligitur pro singulari alicuius inferioris, & regulariter pro singulari, quod est Corpus CHRISTI.

## XLIII.

Sacramentum hoc potest absolutè recipi à non ieiunis, licet tamen & vtiliter, non nisi à solis ieiunis, tamen in aliquo casu potest recipi, etiã ab illis licet & vtiliter, vt in graui infirmitate, vbi timetur, vel adest periculum

culū mortis, similiter in defectu, qui solet accidere circa Consecrationem Sanguinis CHRISTI, proferendo verba Cōsecrationis ex inaduertentia super aquā, omninò debet de nouo Consecrari & sumi, etiam si tunc non sit ieiunus Sacerdos.

## XLIV.

Suscipiens hoc Sacramentum si existit in peccato mortali de quo nō pœnituit nec pœnitet, si id ex malitia faciat, peccat mortaliter, si autem ex ignorantia inuincibili, non item. Similiter licet sibi certò constet, se esse in peccato mortali, si tamen necessitate vrgente & præmissa contritione debita, cum alijs circumstantijs requisitis, sumat, non peccat mortaliter.

## XLV.

Corpus CHRISTI verè & realiter in Eucharistia cōtineri, est de substantia fidei, eo modo, quo cuiuslibet Sacramenti veritas ad fidei articulos pertinet, non obstante quantitate Corporis CHRISTI, & specierum panis & vini, aut modo quantitatiuo, qui potest separari à Corpore CHRISTI ipso remanente quanto, non obstante etiam vbi seu præsentia quam habuit & habet CHRISTVS in Cœlo.

## XLVI.

CHRISTVS DOMINVS vel Corpus CHRISTI ex vi Consecrationis continetur sub speciebus Panis & vini, tanquam proprium signatū & contentum illarum specierum, vt est primum perfectibile ab anima nec vt sic per se primò includit animam, accidentia, vel Sanguinem, sed concomitanter tantum.

## XLVII.

Vnum Corpus esse in diuersis locis circumscriptiuè, nullo modo ex intrinseca ratione repugnat, & hoc posset Deus secundum suam potentiā absolutam facere. Similiter in vno loco circumscriptiuè, & in alio Sacramentaliter, imò de facto Corpus CHRISTI est in Cœlo quantitatiuè, & in Eucharistia Sacramentaliter.

## XLVIII.

Est autem Corpus CHRISTI in Eucharistia, non per solam panis in Corpus CHRISTI conuersionem, aut mutationem alicuius alterius in ipsum, nec per mutationem deperdituam Vbi in Cœlo, aut mutatione  
B 2
specierum,



specierum, sed per mutationem accidentalem, in Corpore CHRISTI acquiritur illius præsentia nouæ in altari, sine amissione tamen illius, quâ habet in Cælo.

## XLIX.

Ante incarnationem potuit, ita vera Eucharistia fuisse, sicut & nunc, & hoc tam quantum ad significationem, quam quantum ad rem significatam & contentam: post incarnationem etiam posset Corpus CHRISTI desinere esse, sub modo naturali, & tamen Eucharistia verè maneret, quantum ad veritatem signi, & quantum ad veritatem signati, & contenti.

## L.

Existencia Corporis CHRISTI, quantum ad duos illos modos existendi, naturalem videlicet & Sacramentalem, est indifferens, & ita potest saluari sub vno, atq; sub alio: neuter etiam modus dependet ab alio necessario, sed contingenter, sic quod vnum ab alio separari non est impossibile, neq; vnus est de essentia alterius, & causa illius.

## LI.

Licet Corpus CHRISTI possit habere existentiam sub vno modo, esto non habeat eam sub alio, Corpori tamen CHRISTI naturaliter existenti, & eidem Sacramentaliter existenti, insunt eadem partes & proprietates, quàmuis nulla sit necessitas simpliciter, quòd si sub modo naturali habet partes, & proprietates; quòd habeat easdem sub modo Sacramentali.

## LII.

Quæcunq; etiam operatio inest CHRISTO primò in Cælo, eadè etiam concomitanter sibi potest inesse in Eucharistia, sensationes tamen & aliæ operationes, quæ sunt totius per se primò vt subiecti, primò in Eucharistia inesse non possunt. Intellectio verò & volitio, quæ insunt animæ per se primò vt subiecto possunt ibi primò inesse.

## LIII.

Nec propriè nec extensiuè sumpto motu, Corpus CHRISTI ab aliqua creatura in Eucharistia moueri potest; sed tantum à prima causa immediate, potest tamen motu illo quo mouetur primò in Cælo, moueri concomitanter in Eucharistia. Et licet quacunq; potentia actiua, siue ex parte principij & termini simul, siue tantum ex parte principij spirituales possit

possit vti CHRISTVS in Eucharistia, non tamen anima CHRISTI potest Corpus proprium mouere in Eucharistia.

## LIV.

Intellectus noster pro statu viæ non potest naturaliter videre Corpus CHRISTI in Eucharistia, potest tamen intellectus à sensibilibus abstractus. Intellectus etiã beatus, nullo modo per actũ beatificũ Corpus CHRISTI in Eucharistia videt. Posset etiã Deus de potentia sua absoluta causare in oculo glorioso, vel non glorioso, visionẽ illius Corporis, non tamen illa visio etiam sic causata esset illius, vt in Eucharistia primò.

## LV.

Solus panis triticeus cum aqua elementari coagulatus, est materia conueniens conuersionis in Corpus CHRISTI, & similiter solum vinum expressum de vua vitis, est materia conueniens in hoc Sacramento transubstantiationis in Sanguinem CHRISTI DOMINI. Apponere autem aquam vino, quamuis non sit de necessitate Sacramenti, est tamen de necessitate Ministri & præcepti, quæ ita tempestiuè est apponenda, vt conuertatur in vinum, ante calicis consecrationem.

## LVI.

Transubstantiatio est transitio totalis substantiæ in substantiam quare virtute creata non potest fieri, sed soli virtuti actiuæ increati agentis est possibilis, quæ de facto in hoc Sacramento totam præexistentem substantiam panis conuertit in totam substantiam Corporis CHRISTI, & totam substantiam vini in totam Sanguinis.

## LVII.

Huius transubstantiationis formalis terminus, non est compositum ex materia & anima intellectiua, vt dat esse corporeum, nec materia vt habet modum quantitatum, sed forma corporeitatis, vt est altera pars compositi, quod est proximum receptiuum animæ.

## LVIII.

Licet virtute diuina omne ens creatum, totaliter conuerti seu transubstantiari in aliud sit possibile, quæ possibilitas oritur ex plena obedientia cuiuslibet entis creati ad Deum, enti nihilominus creato conuerti in deitatem, vel deitati in ens creatum omninò repugnat, quare nec natura diuina potest conuerti in aliud, nec etiam aliquod ens creatum in naturã



diuinam: potest autem conuersio creaturæ in creaturâ esse non solum in præfens, sed etiam in distans.

## LIX.

Conuersio panis in Corpus CHRISTI non potest verè exprimi & signari, per verbum essendi vel fiendi, nec etiam per verbum posse vel possibile, & hoc secundum quamcunq; temporis differentiam, & propterea præpositio exprimens conuersionem panis in Corpus CHRISTI, nunquam potest formari veraposito utroq; termino in recto, sed alterum extremorum est ponendum in obliquo, addita præpositione DE, aut EX, vel etiam addendo ad terminum ad quem præpositionem IN

## LX.

Implicat contradictionem accidens pro per se significato, intelligere non esse in subiecto, & similiter accidens respectiuum pro denominato extendendo subiectum ad fundamentum. Accidens tamen quodcunq; absolutum in concreto sumptum, est seperabile à subiecto, & inhærentia actualis, non est de essentia eius, sed secundario importatur ab ipso, quæ si actualis sit, reponitur in prædicamêto relationis extrinsecus aduenientis.

## LXI.

Subiectum accidentis proximum non est sola substantia, sed etiam accidens, remotum tamen siue vltimatû, sola præcisè est substantia. Porro accidens respectiuum licet non possit existere sine proximo subiecto, potest tamen sine remoto, accidens verò absolutum in se consideratum potest manere separatum etiam à quocunq; proximo subiecto, de facto tamen sola quantitas est sic separata, non item qualitas.

## LXII.

Accidens absolutum extra subiectum existens, vt est in Sacramento Eucharistiæ, nullo modo potest vt agens principale totale, vel dispositiuum substantiâ producere, potest tamè accidens hoc modo separatû agere intentionali actione in sensum, & Physica ac reali in contrarium, si tamen est sub modo conuenienti sibi ad agendum.

## LXIII.

Possibilis est manente Eucharistia permutatio specierum localis, & similiter alteratiua qualitatum mutatio. Condensatio etiam & rarefactio specierû contingere potest, causante eam supernaturali agente Deo,  
& hoc

& hoc nō aliquo nouo miraculo, sed illa eadē volūtate, qua disposuit Eucharistiā esse in Ecclesia, disposuit etiā quòd circa illas species, præsente a-  
ctiuo naturali, causaret talē transmutationē, qualem in substantijs con-  
uerlis causaret agens naturale, & hoc ne meritum fidei euacuaretur.

## LXIV.

Transmutatio corruptiua qualitatum in Sacramento Eucharistiæ  
agenti creato est possibilis. Corruptiua autem quantitatis soli primo en-  
ti increato, est tribuenda. Porro in transmutatione priori non oportet  
semper substantiam redire actione diuina, vel agentis naturalis, in poste-  
riori verò necesse est post corruptam quantitatem, redire substantiam,  
immediatè à solo Deo productam.

## LXV.

Solus Deus vt agens principale, actione sua cui subest totaliter esse  
& non esse, vtriusq; termini conuersionis conuertere potest, & de facto  
conuertit substantiam panis in substantiam Corporis CHRISTI, & sub-  
stantiam vini, in substantiam Sanguinis. Creatura verò quæcunq; sit illa  
nullo modo potest actione reali & physica attingere talem conuersionē,  
actio tamen instrumentalis vel ministerialis non est deneganda agenti  
creato, quòd proferendo Consecrationis verba ministerialiter talē  
causat conuersionem.

## LXVI.

Excellentissimum hoc Eucharistiæ Sacramentum, solus Sacerdos ritè  
ordinatus modo prædicto conficere potest, quicunq; tandem sit, modo  
possit consecrationis verba proferre, cum intentione debita; Vnde &  
degradatus potest consecrare. Ad benè nihilominus & ordinatè confici-  
endum, præquiruntur multæ conditiones, tenentes se ex parte mini-  
stri, loci, & temporis.

## DE POENITENTIA.

## LXVII.

**P**OENitentia quæ est secunda post naufragium tabula, necessaria est ho-  
minibus per peccatum à Deo separatis, ad deletionē peccati mortu-  
lis post



l's post Baptismum commissi, non tamen necessitate absoluta, cuius oppositum includat contradictionem, sed solum necessitate præfixa à lege diuina, ordinante peccatum puniri, per pœnam tanquam per proprium correspondens.

## LXVIII.

Per actum dilectionis Dei super omnia, tanquam per pœnitentiam virtualement, & aliquid æquiualens pœnitentiæ formali, in acceptatione diuina potest aliquis iustificari, & remissionem peccatorum attenta potentia Dei absoluta, adipisci. Nulla etiam est repugnantia, hominem in peccatis existentem, sine pœnitentia formali, vel virtuali, per solam simplicem peccatorum, à Deo condonationem esse extra omnem peccati statum.

## LXIX.

Deum remittere peccata non est tantum illa dissimulare aut tegere, neq; etiam solum nolle vindictam sumere de peccatis, sed est velle placari, & amplius peccatorem non habere vt inimicum, & ira, ac odio dignum, sed amicum gratia ornatum, & ad gloriam æternam acceptatum: posset tamen Deus per absolutam potentiam remittere peccata, per solam nolutionem vindictæ & condonationem, culpæ, absq; vlla gratiæ infusione, & ad gloriam acceptatione. Quare remissio culpæ, & infusio gratiæ, non vna mutatio, sed duæ.

## LXX.

Pœnitentia interior habitualis est virtus genita ex actibus vindicandi & detestandi commissum, & similiter ex actibus acceptandi, & supportandi pœnam inflictam, sed genita ex actibus vindicandi est virtus specialis, ex actibus verò detestandi generalis, sicut producta ex actibus acceptandi pœnam, est generalis, ex actibus verò supportandi specialis.

## LXXI.

Est autem pœnitentia interior sumpta pro habitu vindicandi, virtus specialis potentiæ appetitiuæ, non verò intellectiuæ, neq; tamen appetitiuæ ordinantis ad seipsum, sed ad alterum vel quasi ad alterum, & continetur sub iustitia, prout in generali dicitur iustitia, omnis virtus ordinatiua ad alterum, vel quasi ad alterum, non tamē vt pars subiectiua sed potētialis.

## LXXII.

## LXXII.

Hæc virtus est iustitia punitiua, vt distinguitur contra iustitiam commutatiuam, & amicitiam, quæ pro fine & motiuo per se, remoto tamen, habet bonum legis & communitatis, pro fine verò proximo bonum legislatoris, qui est melior communitate & lege, pro fine autem ac motiuo secundario & accidentali correctionem puniti, & reductionem in amicitiam pristinam iniuriati & offensi.

## LXXIII.

Virtus prædicta siuè sequatur regulam in intellectu naturaliter cognoscibilem ab intellectu Angelico, vel humano, siuè etiam regulam quæ habetur ex reuelatione, non est Theologica virtus, sed moralis, nec tamen moralis supernaturaliter infusa, sed acquisita, ex pluribus actibus poenitendi sicut oportet, inclinans ad similes actus, ex quibus genita est: est tamè inter omnes virtutes morales nobilissima, virtute præmiatiua excepta.

## LXXIV.

Obiectum illius vt est hæc particularis virtus, scilicet destructiua peccati & sanatiua peccatoris, est id quod remanet in peccatore transeunte actu peccati interiori & exteriori: illud autem non est sola denominatio extrinseca desumpta ex actu præterito non retractato, vel non condonato, neq; etiam denominatio intrinseca desumpta ab aliqua qualitate, dispositione, vel habitu vitioso, vel à relatione reali intrinsecus, vel extrinsecus adueniente, sed est ipsa macula.

## LXXV.

Satis improbabilis & reiicienda est illa opinio quæ dicit, quòd peccator transeunte actu peccati interiori & exteriori denominatur non solum absolutè peccator, sed etiam quoad grauitatem, vel multiplicitatem peccatorum, à sola priuatione iustitiæ habitualis, seu gratiæ iustificantis in se vel in suis effectibus, siuè illa priuatio gratiæ sit in fieri, siuè in facto esse, siuè talis priuatio absolutè sumatur, siuè etiam in ordine ad culpam, & talis priuationis causam.

## LXXVI.

Actus verò prædictæ virtutis sunt quatuor, scilicet: vindicare commissum, detestari commissum, acceptare poenam inflictam, & patienter supportare



supportare eandem: hi quatuor actus dicunt ordinem ad pœnam & tris-  
titiâ, differenter tamen. Primus namque dicit talem ordinem ad pœ-  
nam, tanquam causa remota ad suum effectum remotum, & etiam ad ob-  
iectum intentum: Secundus vt causa proxima partialis, non intendens  
effectû proximû tantû: reliqui duo, vt ad obiectû non verò vt ad effectû.

## LXXVII.

Isti actus sunt circumstantionabiles circumstantia quadruplicis vo-  
luntarij, scilicet: velle punire, nolle peccasse seu detestari, velle acceptare  
punitiorem inflictam, & patienter supportare eandem. Sic tamen quòd  
velle vindicare, addit de ratione voluntarij supra detestari, & detestari  
supra acceptare, & acceptare supra supportare, sunt etiam circumstanti-  
onabiles alijs circumstantijs specialibus, obiecti, finis, & modi.

## LXXVIII.

Nullus istorum actuum vt est dispositio præuia ad deletionem pec-  
cati mortalis, debet esse necessariò formatus, sed sufficit informis, debet  
tamen procedere à principio aliquo supernaturali, & ex parte intellectus,  
& ex parte voluntatis, si est dispositio ad delendum peccatum vt offensi-  
uum Dei, & vt impeditiuum præmij, & vt inductiuum supplicij. Illud  
verò principium supernaturale est intellectus considerans peccatum sub  
istis rationibus, & voluntas detestans illud idem, adiuta auxilio superna-  
turali & inspiratione diuina.

## LXXVIII.

Detestatio peccati vt est offensiuum Dei & inductiuum supplicij est  
attritio, & imperfecta contritio, ab auxilio supernaturali procedens, que  
non solum vt dispositio, sed etiam vt meritum de congruo ad deletionem  
peccati mortalis, & iustificationem peccatoris, quæ sequitur in termino  
meriti de congruo requiritur & sufficit, si tamen sit perfectè circumstan-  
tionata in genere moris, ita quòd nulla circumstantia præquisita desit, nec  
etiam aliqua inordinata adsit.

## LXXX.

Regulariter loquendo, illa pœnitentia, vel dolor vt sit meritum de  
congruo respectu iustificationis & remissionis peccatorum, requirit aliquâ  
intensionem vel extensionem secundum Dei legem aut voluntatem, &  
hoc non solum vt est satisfactoria pro pœna, verum etiam vt est ordina-  
tia cul-

## THEOLOGICÆ.

19

tiua culpæ. Potest tamen homo sine vlla intensiōe vel extensiōe talis actus, iustificari per solam substantiam actus pœnitentialis.

### LXXXI.

Ille idem motus liberi arbitrij contra peccatum qui dicitur attritio, si manet in esse naturæ & moris, vique ad instans infusiōis gratiæ fit contritio, extrinsecè quidem ratione gratiæ informantis, intrinsecè verò non per productionem noui actus contritiōis, vel mutationem substantiæ actus præcedentis, sed solum per mutationem obiecti seu finis doloris. Quare attritio & cōtritio specie distinguuntur, nō tamē intrinsecè, sed extrinsecè distinctione specifica desūpta ex alio & alio obiecto vel motiuo.

### LXXXII.

Per attritionem deletur culpa, vt per dispositionem præuiam ad gratiam iustificantem, non quidem in genere causæ formalis, tanquā per formam impossibilem totalem vel partialem, sed in genere causæ materialis & efficientis. Per contritionem verò, vt per dispositionem concomitantem, sic tamen quod ibi est assignare ordinem naturæ inter attritionem, vt præcedentem gratiam inter charitatem, & inter actum pœnitentiæ, vt est formatus.

### LXXXIII.

Pœnitentia accepta pro tristitia, causata à voluntate imperante, vt à causa remota, & voluntate nolente ac intellectu considerante vt à causis proximis, non est virtus, sed est passio naturaliter concomitans nolitionē actualem alicuius, & considerationem actualem illius noliti; potest tamē esse voluntaria, non quidem voluntate sequente affectionem commodi, sed voluntate sequente affectionem iustitiæ.

### LXXXIV.

Pœnitentia exterior, est nouæ legis Sacramentum à CHRISTO DOMINO institutum, per quod deletur omnis culpa mortalis post Baptismum commissa, eius definitio hæc est: Pœnitentia est absolutio hominis pœnitentis, facta certis verbis, cum debita intentione prolatis à Sacerdote iurisdictionem habente, ex institutione diuina, efficaciter signantibus absolutionem animæ à peccato.

### LXXXV.

Materia huius Sacramenti remota sunt peccata post Baptismum cō-



missa, proxima verò sunt actus pœnitentis. Forma necessaria ex parte Sacramenti, sunt quæcunq; verba, quibus sufficienter actus sententiæ absolutæ exprimitur, & authoritativa peccatorum remissio explicatur.

## LXXXVI.

Forma verò necessaria ex parte Ministri & sufficiens ex parte Sacramenti est illa, qua cõmuniter utitur Ecclesia. **Ego te absoluo &c.** in qua, illa quæ vel præmittuntur vel consequuntur, sunt ex consuetudine diuersa diuersimodè in diuersis Ecclesijs, & ex deuotione adhibenda.

## LXXXVII.

Hoc Sacramentum quemadmodum & cætera Sacramenta constat & perficitur materia vel quasi materia, & forma, includendo aliqualem compositionem, & constitutionem ex actibus pœnitentis & absolutione, neq; totum hoc Sacramentum in sola materia & actibus pœnitentis, vel in sola absolutione Sacerdotis, sed in utroq; simul, licet in absolutione principaliter consistit.

## LXXXVIII.

Contritio, confessio, Satisfactio, non sunt vlllo modo partes essentielles, vel integrales pœnitentiæ virtutis, vt est quædam iustitia inclinans in vindictam peccati. Et similiter ista tria, nullo modo sunt partes pœnitentiæ, vt pœnitentia est actus imperatiuus pœnæ vindicantis culpâ, ponuntur tamè partes integrales pœnitentiæ, vt est causa proxima pœnæ infligendæ & etiam ipse puniri, vt est effectus remotus actus imperantis; pœnitentiæ autè Sacramenti nō sunt propriæ partes sed quasi partes.

## LXXXIX.

Ad substantiam & efficaciam Sacramenti Pœnitentiæ requiritur aliquis dolor de peccatis omnibus, cum præposito cauendi in futurum, & nō sufficit sola voluntas suscipiendi Sacramentum, licet non adsit ad peccatū aliquis affectus, vel aliquod interius impedimentum, sed est necessaria displicentia & dolor, qui sit attritio cognita & supernaturalis, & ista sola sufficit ad iustificationem per Sacramentum. Quare contritio perfecta & consummata, cum Sacramento necessaria non est.

## XC.

Confessio ad Sacramentū pœnitentiæ prærequisita, & à CHRISTO Domino

DOMINO instituta, est necessaria necessitate præcepti, hæc tamen necessitas non est ex præcepto legis naturæ, sed ex præcepto diuino positiuo & Ecclesiastico. Illa autē necessitas confitēdi quæ est ex præcepto diuino, ortū habet ex illis verbis Ioā: 20: **Accipite S. sanctum &c.** ex quibus sufficienter talis necessitas confitendi Sacerdotibus colligitur, adhibita declaratione & interpretatione Ecclesiæ.

## XCI.

Præceptum de confessione includit quis teneatur confiteri, quod scilicet adultus: & quid debet confiteri, quod scilicet solum mortale post Baptismum commissum, & hoc de necessitate, præmissa diligenti inquisitione, secundum possibilitatem fragilitatis humanæ. Et non solum peccata, sed etiam circumstantias speciem mutantem & notabiliter aggrauantes: alleuiantes autem & impertinentes non item. Includit præterea cui teneatur confiteri, quia Sacerdoti, quando, & qualiter, quia cum displicentia de peccatis.

## XCII.

Ecclesia specificauit hoc præceptum diuinum, non quoad omnia sed quoad aliqua: quantum ad tempus determinauit, quod scilicet semel in anno; quantum ad personam confitentem, quod scilicet adultus, qui ad annos discretionis peruenit; quantum etiam ad audientem confessionē determinauit, quod debet esse Sacerdos proprius, quare nullo modo licet confiteri laico vel Sacerdoti alieno.

## XCIII.

Proprius Sacerdos est ille, qui habet iurisdictionem ordinariam, vel delegatam ad absoluendum confitentem, hæc autem autoritas simpliciter principalis soli competit Deo, præcellens soli CHRISTO DOMINO, ministerialis verò & particularis potest conuenire alicui in Ecclesia militanti, quæ autoritas non solum se extendit ad remittendam poenā, sed etiā ad remittendā culpā, fuitq; tradita Apostolis per illud, Ioā: 20: **Quorū remisieritis &c. & vocatur propriè clauis potestatis.**

## XCIV.

Illud etiam quod ordinatur ad potestatem sententiandi & à peccatis absoluendi, vel cuius vsus ordinatur ad vsu istius, potest dici clauis, & instru.



& instrumentum aperiendi vel claudendi Cœlum, licet remotum, & talis est autoritas cognoscendi in causa peccatoris, & vocatur clavis scientiæ. Non est autem ista clavis scientiæ aliqua scientia actualis vel habitualis, aut discretio quæcūq; sed autoritas cognoscendi in causa rei, ad cuius rectū vsum requiritur scientia actualis, vel habitualis, non tamē ad potestatem vsum simpliciter.

## XCV.

Istæ duæ claves, non sunt idem cum charactere Sacerdotali, quæ est potestas conficiendi Corpus & Sanguinem CHRISTI, nec inter se, imò possent de potentia Dei absoluta separari ab inuicem, de facto tamen & potentia ordinata, committitur vtræq; autoritas & clavis cuilibet Sacerdoti Ecclesiastico completè ordinato, dum recipit ordinem Sacerdotale. Hæc tamē potestas absoluedi, quam accipit ex ordinatione, non est proxima sed tantum remota, fit autem proxima dum iam ordinato per Superiores subduntur aliqui, in quos ille habeat jurisdictionem.

## XCVI.

Præter has duas claves (quæ sunt fori secreti) sunt aliæ duæ in Ecclesia, pro foro publico, in quo quispiam excommunicatur, aut absoluitur eisdem quidem nominibus nuncupatæ, sed re ipsa distinctæ, separabiles ab inuicem. Et illæ quæ sunt fori secreti, non possunt esse nisi penes personas Ecclesiasticas in Sacerdotali dignitate positas, quæ autem sunt fori publici, possunt esse penes personas sæculares.

## XCVII.

Quamuis Sacerdos non in persona Dei sed in propria vltissimi minister, absoluat, & prædictis clauibus sententiando, & peccatorum defectus cognoscendo vtatur, tenetur nihilominus iure naturæ & Ecclesiastico, peccata sibi in confessione detecta perpetuo celare, & etiam circumstantias, per quas posset quis deuenire in notitiam peccatorum. Et non solum Sacerdos, sed quicunq; eorum habuerit notitiam, aut per imprudentem Confessorem, aut audiendo confessionem ipsam, & hoc non solum dum pœnitens viuit, sed etiam ipso defuncto.

## XCVIII.

Quodcunq; secretum sibi extra Confessionem detectum, tenetur similiter celare, nec solum quando exprimit committens se velle illud committere

mittere secretum, sed etiam si aliquo alio modo velit id esse secretum si tamen vergeret in detrimentum Reipublicæ, aut tertiæ personæ, tunc illud reuelare posset, peccatum verò in confessione detectum, propter quodcumq; detrimentum Reipub. aut alicuius, nunquam detegi debet, esto aliquis id superior præcipiat.

## XCIX.

Satisfactio quæ est tertia pars pœnitentiæ generaliter sumpta, est redditio voluntaria æquiualentis aliàs indebiti, quæ satisfactionis definitio, est communis ad contractus & obligationes quasquinq; , & tam in actibus liberalibus, quàm etiam in actibus quodammodo necessarijs inuenitur. Satisfactio verò strictè sumpta, est operatio exterior laboriosa, vel pœnalis, voluntariè assumpta ad puniendum peccatum à se commissum, ad placandam Diuinam offensionem.

## C.

In virtute Passionis CHRISTI DOMINI potest homo satisfacere Deo pro peccato proprio, ratione cuius acceptatur à Deo talis satisfactio. Potest etiam secundum potentiam Dei absolutam, purus homo satisfacere Deo pro offensa, secundum liberalem Dei acceptationem: præcisa Passione CHRISTI, sed secundum purâ & rigorosâ iustitiâ, nec, purus homo solus, nec in virtute Passionis CHRISTI satisfacere potest.

## CI.

Satisfactio interior magis consistit in actibus pœnalibus interioribus & exterioribus, vel passionibus voluntarijs, quàm in alijs actibus bonis non pœnalibus, potest tamen quandoq; per aliquem actum bonum non pœnalem satisfieri Deo. Neq; est necessarium, quod cuiuslibet peccato propria & determinata secundum numerum vel speciem corresponderet satisfactio, sed potest sufficere vna, debet tamen esse talis: quod aliquid eius sufficiat pro vno peccato, & aliquid pro alio.

## CII.

Totalis satisfactio interior, si tamen non est diminuta, potest sola reconciliare Deo, & de facto reconciliat satisfacientem, impossibile tamè est hoc modo satisfacere ipsi, pro vno peccato, quin etiam aliquo modo satisfaciat pro alio. Satisfactione autem exteriori, (quæ consistit in actu exteriori, vt distinguitur contra actum interiorem mentis & oris) est possibile



possibile satisfacere pro vno, esto nullo modo satisfaciat pro alio peccato.

## CIII.

Ultra tria prædicta, quæ sunt partes Pœnitentiæ; necessarium est ad verè pœnitendum, vt remouens prohibens rei alienæ iniuste ablata, vel detentæ, restitutio; non tamen necessitate medijs, sed tantum necessitate præcepti diuini & humani, quare qui rem detinet alienam inuito Domino, vel etiam iniuste abstulit, moraliter, aut physice, siue in bonis fortunæ, siue personæ, siue in bonis animæ, secundum modum possibilem, restituere debet damnificato, & hoc statim effectu vel affectu, si tamen vergat talis restitutio in detrimentum eius, vel tertij, non debet statim restituere effectu.

## CIV.

Restitutio præsupponit homines in particulari rerum dominium & proprietatem habere, per diuisionem dominiorum, quæ fuit facta in statu naturæ lapsæ, non iure naturali, aut diuino, sed humano, potuit autem hæc diuisio esse iusta, si fuit facta à lege positua iusta, siue lata à Patre, siue à Principe, siue à communitate iuste regnante vel regente.

## CV.

Diuisionem dominiorum sequitur translatio eorundem, quæ potest esse vel quantum ad dominium & vsum simul, vel quantum ad dominium tantum, vel quantum ad vsum tantum, & hoc aut authoritate legis, aut voluntate proprii domini, qui talè dominium transferre potest, vel per actum merè liberalem, qualis est in donatione, vel liberalem secundum quid, qualis est in permutatione, emptione, venditione, alijsq; contractibus, & si istæ translationes fiant secundum præscriptum legis, & sine fraude, iuste fiunt, si autem fiant cum aliqua deceptione, vel superioris prohibitione, omnino sunt iniusta.

## CVI.

Tempus pœnitendi est quodlibet tempus vix, & propterea pœnitentia vera siue interior sola, siue exterior, cum susceptione Sacramenti pœnitentiæ, sufficit ad salutē etiā in extremis, regulariter tamē talis pœnitentia, vix est vera propter impedimenta, quibus tunc inuoluitur homo.

## CVII.

Post hanc vitam possunt aliqua peccata dimitti à Deo, non tamen mortalia

mortalia, quo ad offensam, & pœnam æternam, sed quoad temporalem; venialia verò, quæ non puniuntur à Deo, siue hic, siue in inferno, vel Purgatorio, nisi pœna temporali, & nullo modo æterna, etiâsi cum mortali sint coniuncta, multa prædicto modo dimittuntur.

## CVIII.

Peccatum acceptum pro reatu & obligatione ad pœnam peccatis correspondentem, per potentiam Dei absolutam idem numero redire potest, licet per resipiscentiam dimissum fuerit, secundum tamen potentiam ordinatam, nusquam redit. Possunt etiam redire peccata dimissa eadem numero, vt circumstantiæ aggravantes subsequentiâ peccata, quæ magis vitare debuit reciduians, & ratione gratitudinis, & fidelitatis, quàm quicumq; alius.

DE SACRAMENTO EXTREMÆ  
Vnctionis, Ordinis, & Matrimonij.

## CIX.

**S**acramentum vñctionis extremæ fuit possibile institui à CHRISTO DOMINO, & congruum, & ita de facto fuit ab ipso institutum, & à D. Iacobo promulgatum, cuius perfectâ definitio hæc est: Extrema vñctio, est vñctio hominis infirmi pœnitentis, facta in determinatis partibus corporis, cum oleo consecrato ab Episcopo, ministrata à Sacerdote simul verba certa, cum intentione debita proferente, ex institutione diuina, efficaciter significans curationem finalem venialium.

## CX.

Hæc ratio seu definitio Sacramenti vñctionis non est in se falsa, nec vna pars alteri repugnat. Materia proxima & signum extrinsecum in hoc Sacramento est vñctio, significans interiorem vñctionem curatiuam. Materia remota est oleum ab Episcopo benedictum. Minister est Episcopus vel Sacerdos. Forma est illa quæ his cōtinetur verbis: **Per istam sacram vñctionem &c.**

## D. . . . . CXI.



## CXI.

Ordo est nouæ legis Sacramentum, accipiendo ordinem non pro aliquo gradu eminenti in Ecclesia, sed pro ordinatione seu institutione in gradu Ecclesiæ, quæ ordinator fit à Ministro idoneo, certa verba proficiente, cum aliquo signo visibili, ministerium illius ordinis representante, ex institutione diuina, efficaciter significans gratiam præeminentem, qua ordinatus dignè aliquod ministerium exequatur.

## CXII.

Sacramentum Ordinis est à solo CHRISTO DOMINO institutū, & est vnum vnitatis genericæ, continens sub se septenarium ordinationum seu ordinum numerum, in quantum est vnum Sacramentum. An verò Episcopatus sit ordo distinctus à Sacerdotio vel non, videant Canonistæ. Hoc certum esse debet, nobilissimum in Ecclesia simpliciter actum esse consecrationē Eucharistiæ, & ille cui competit talis actus, scilicet Sacerdos, est in nobilissimo collocatus Sacerdotij gradu.

## CXIII.

Materia huius Sacramenti est tum instrumentorum porrectio, tum etiam manuum impositio, & alia visibilia signa. Forma sunt illa verba quæ Episcopi habent in suis libris Episcopalibus, & illis vtuntur vt forma: in Sacerdotio tamen sunt duæ formæ partiales. Proprius Minister est solus Episcopus, nec vnquam Ecclesia Presbyteros, vel Diaconos, ab alio quàm ab Episcopo ordinatorum agnouit, aut recepit. Eius effectus est perpetua & spiritualis potestas ad suum munus, in cuius signum character imprimitur, & ad eius bonum vsum gratia confertur.

## CXIV.

Expænis Canonicis quæ sunt numero septē: Depositio, Degradatio, Infamia, Irregularitas, Excommunicatio, Interdictum, & Suspendio, quinque; vltimæ, non impediunt à susceptione & collatione ordinem de facto, sed vna cum illis stat ratio Ministri susipientis, intentio, & reliqua necessaria, de iure tamen prohibent, sic quod illicitè contrarium attentatur. Similiter ætas puerilis nullomodo impedit à collatione ordinum de facto, benè tamen sexus muliebris.

## CXV.

Matrimonium est de iure naturali & diuino positiuo in ratione contra ctus

tractus, qui licet ex se non sit sufficienter bonus bonitate morali, est tamē rectē circumstantionabilis debitis & honestis circumstantijs. In ratione etiam Sacramenti est de iure diuino, institutū à CHRISTO DOMINO, non tamen in statu inōcentiæ, vel in lege Mosayca, sed in lege Euangelica.

## CXVI.

In lege nona contractui Matrimoniali annexit Deus Sacramentum propriē dictum. Cuius materia remota sunt ipsi contrahentes, materia proxima & forma sunt actus contrahentium expressi verbis vel signis, nō tamen prognosticis sed demonstratiuis. Minister non est Sacerdos, sed ipsi contrahentes.

## CXVII.

Aliud est matrimonium, aliud contractus Matrimonij, & aliud Sacramentum Matrimonij, neq; tamen Matrimonium vt est indifferens ad ista est æquiuocum, sed de primo, quod significat, dicitur in recto, de reliquo verò quod connotat in obliquo, secundū constructionem transitiuam. Est autem Matrimonium viri & mulieris coniunctio maritalis, inter legitimas personas vitam indissolubilem retinens. Congruū autem est talem coniunctionem esse indissolubilem, præcipiente id lege diuina & naturali.

## CXVIII.

Consensus requiritur ad Matrimonium & Sacramentum Matrimonij, vt dispositio præuia, non tamen quicunq; sed expressus, per verba de præsentī, non coactus, sed liber & voluntarius, non ille qui sequitur rationem vel apprehensionem erroneam, sed qui concomitatur scientiam omnium conditionum requisitarum, per se ad talem contractum, quarum duæ se tenent ex parte contrahentium, & vna ex parte contractus.

## CXIX.

Potest aliquis contrahere Matrimonium cum proposito statim vouendi castitatem, & qui hoc modo contraheret, verē contraheret, neq; talis contractus præiudicat voto castitatis, sicut nec vsus Matrimonialis sub conditione implicita in illo contractu inclusus, nisi illa conditio & res ponatur in effectū, & ideo vbi est certitudo quod nunquam ponetur in effectū, ibi nullo modo præiudicat voto castitatis talis contractus, quare inter Beatissimam Virginem MARIAM & Ioseph fuit verū Matrimonium.



## CXX.

Tria sunt Matrimonij bona: Sacramentum, Fides, & proles grante acceptanda, & religiose educanda, & hoc sub conditione si videlicet eueniat, quare est necessarium coniuges sibi mutuò reddere debitum, hæc tamen reddendi debiti obligatio intelligitur, nisi alterius petendi vel vterque amiserit, & nili fortiori & maiori vinculo obligetur ad non reddendum, tunc enim reddere non debet.

## CXXI.

Bigamià & Pòligamià multorum coniugum successiua, tam viris quam fœminis permisa fuit in lege Mosayca, & nunc in lege noua non est prohibita. Multorum verò simul omnibus in lege Euangelica prohibetur, in lege tamen Mosayca quo ad hoc dispensatum fuit à Deo, & ideo potuit esse iusta ex parte contrahentium, & debitè circumstantionabilis, & accedente Dei ordinatione necessaria.

## CXXII.

Bigamiæ est annexa irregularitas, quare qui Bigamus fuit siue antè Baptismum siue post, est irregularis; homicida verò antè Baptismum, post Baptismum irregularis non est. Omnes Bigami sunt arcendi ab ordinibus sacris, & hoc est valdè congruum, propter defectum signi, & representationis personæ CHRISTI in comparatione ad Ecclesiam, qui solus fuit Ecclesiæ perpetuus sponsus.

## CXXIII.

Repudiare & dimittere vxores Moyse vt legis Diuinæ promulgator Iudæis permisit, quare repudium fuit licitum in illa lege ex dispensatione Dei, qui sicut dispensauit cum Patribus in Bigamià, propter bonum prolis, ita dispensauit cum illo populo duro & rudi in repudio ad vitandum vxoricidium. Pro tēpore verò legis Euangelicæ, pro quo CHRISTVS DOMINVS reduxit Matrimonium ad primam sui institutionem & integritatem, repudiare non licet.

## CXXIV.

Impedimenta Matrimonij simpliciter sunt illa, quibus existentibus si fuerit attentatum nihil fit, hæc autem quædam se tenet ex parte contractus, & sic inuoluntarium ex scientia, & similiter inuoluntarium ex ignorantia,

rantia, & defectu notitiæ præcedentis, siue totalis siue aliqualis, necessa-  
rio tamen prærequisitæ ad contractum impedit Matrimonium simpliciter.

## CXXV.

Quædam etiam impedimenta tenent se ex parte contrahentium, qui  
in tali contractu debent sibi tradere mutuò corporum potestatem, & ideo  
talis tradendi impotentia, siue proueniat à natura, siue à casu, si sit per-  
petua impedit simpliciter, secus verò si perpetua non sit. Huc etiam re-  
ducitur impotètia ex iustitia, qua scilicet est alteri alligat<sup>9</sup>, & defect<sup>9</sup> ætatis.

## CXXVI.

Ex lege verò & statuto Ecclesiæ, quæ nihil determinando circà formam  
vel materiam huius contractus Sacramentalis, aliquas illegitimauit per-  
sonas, faciendo eas incapaces huius contractus, desumuntur impedi-  
menta simpliciter, illa scilicet quæ oriuntur ex propinquitate nimia con-  
trahentium inter se, vel ad cultum diuinum specialem applicationem, &  
alicuius alterius criminis horrendi enormitate.

DE RESVRRECTIONE VNI-  
uersali mortuorum.

## CXXVII.

**R**esurrectio Vniuersalis, quæ est iterata hominum mortuorum pro-  
ductio, est possibilis ex parte Dei; ex parte quoq; hominum repro-  
ducendorum, nulla est in hoc ratio impossibilitatis: quod etiam  
de facto sit futura; veritas fidei Christianæ docet, in qua omnes tam ele-  
cti quàm reprobi resurgent.

## CXXVIII.

Futuram hominum resurrectionem, si quis naturali ratione demon-  
strare vellet, talem demonstrationem à specifica hominis forma, vel ope-  
ratione eidem secundum hanc formam competentē, & non aliundè acci-  
pere deberet; nulla tamen talis demonstratio afferri potest, licet simili-  
tudinibus & topicis rationibus possit ostendi & declarari.



## CXXIX.

Nullum agens naturale quantumcunq; perfectum, potest esse causa efficiens, principalis, vel minus principalis, resurrectionis mortuorum, sed soli virtuti actiue diuine subest talis hominum productio. Et licet agens naturale posset idem numero reproducere, non potest tamen eò modo, quo ibi reproductio fiet.

## CXXX.

Licet resurrectio actiua non sit possibilis, nisi à causa supernaturali excedente totum ordinem causarum creatarum, & à causa libera, liberè agente, & propterea & ex parte principij actiui, & ex parte termini sit futura simpliciter supernaturalis; resurrectio tamen passiuà erit naturalis, vt naturale opponitur violento.

## CXXXI.

Resurrectio quoad collectionem puluerum materialium Corporis resuscitandi, quæ fiet ministerio Angelorum, non erit in instanti sed in tempore, quo ad animationem autem & Corporis formationem, quæ fiet virtute diuina, erit in instanti, & in eodem instanti.

## CXXXII.

Non omnes homines simul resurgent, sed resurrectio eorum qui inuenientur tunc mortui, duratione præcedet resurrectionem eorum, qui inuenientur viui. Fiet verò resurrectio in loco determinato vniuersi, & hora determinata, non erit tamen media nocte, sed de die.

## CXXXIII.

In resurrectione mortuorum non redibit totum id, quod fuit de veritate naturæ humanæ pro quocunq; tēpore vel instanti vitæ, sed redibūt partes puriores genitæ ex nutrimento, quæ aliquando fuerunt partes illius corporis, & partes contractæ à parentibus, quæ fuerunt inter omnes purissimæ.

## CXXXIV.

Corpus resurget in debita densitate & magnitudine tanta, quanta fuit vel fuisset in fine triginta annorum si homo vixisset : resurget autem reformatum ex eadem materia, ex qua tempore quo vixit fuit compositum;

tum ; cum capillis & alijs naturæ ornamentis; omnes etiam resurgent in eadem ætate, non tamen in eadem quantitate.

## DE INFERNO ET IGNE Infernali.

### CXXXV.

**F**ide certò & infallibiliter tenendum est dari infernum, qui est quidam locus tenebrosus, & carcer damnatorum, sub terra seu in centro & corde terræ, in quo est ignis non solum metaphoricus & similitudinarius, sed realis, corporeus & sulphureus, qui in æternum durabit, & nō extinguetur in sempiternum. Hoc igne cruciabuntur spiritus nequam, & homines damnati, qui ex illo cruciatu summo afficientur dolore.

### CXXXVI

Dolor tamen propriè sumptus ut distinguitur à tristitia, non est possibile in Angelis, vel animabus separatis, sicut nec appetitus sensitivus vel sensus: dolor verò sumptus pro tristitia, potest in illis esse, & de facto est in malis Angelis, qui causatur nō ex apprehensione ærronea obiecti disconuenientis, sed ex obiecto disconuenienti, ut nolitū est ab ipso.

### CXXXVII.

Illud obiectum sic disconueniens, est ignis infernalis, qui causat tristitiam in spiritu malo, non quidem detinendo eum effectiue, nec etiam detinēdo illū tantū definitiue, sed detinēdo definitiue & immutādo obiectiue per modū obiecti disconueniētis, nō quidē ex suapte natura, sed secundum molitionem & odium, quo odit detentionem ab igne ex decreto diuino, inclinante eum ad tale odium affectione commodi &c.

### CXXXVIII.

Ignis infernalis cruciat spiritus nequam effectiue, secundariò tamen minus principaliter & per modum instrumenti, Deus autem cruciat illos ut causa principalis, & ideo dæmon principalius odit & non vult detineri in igne, vel consideratione ignis ex voluntate diuina, quàm ipsam formalem ignis detentionem, qua detinetur ab igne virtute primi agentis.

### CXXXIX.



## ASSERTIONES CXXXVIII.

Homines etiam damnati cruciabuntur igne infernali: cum verò sola actio intentionalis, sit sufficiens ad dolorem inferendum, conuenientiùs est dicere, ignem intentionali tantù actione agere in damnatos: quod si ponatur eos cruciari ab igne actione reali, & tamen nunquam corrumpi, hoc erit attribuendum dispositioni diuinæ miraculosæ conseruanti vitam illorum.

### CXL.

Nullus quantumcunq; miser propter miseriam pœnæ quam sustinet, potest vel debet appetere & desiderare non esse, & totalem annihilationē sui, secundum dictamen rationis rectę; ad fugiendam tamen miseriam culpæ, vel peccatum, potest quis rectē velle tollerare mortem, ab alio sibi inferendā, aut quoduis suppliciū & annihilationē sui; seipsum verò interimere, vel annihilare nullomodo debet, aut velle ordinatè potest.

### CXLI.

Quamuis homines damnati & miseri, miseria animæ & corporis, debeant satius velle se non esse, quam in peccato & in blasphemia in Deū permanere: nihilominus tamen vero simile est, illos appetere non esse, potius ob pœnā, quam patiuntur, quam propter culpam fugiendam: cuius causa est obstinatio in malo; & quanquam desiderabunt mori, nunquam tamen moriuntur, sed mors fugiet ab eis.

### CXLII.

Damnatorum pœnas, quæ consistunt in pœnalitate ignis, remorsu conscientiæ, & tristitia concomitante, videbunt & cognoscent beati, non quidem in genere proprio, sed in essentia diuina, videndo autem eas, non gaudebunt de ipsis absolutè, sicut nec Deus ipse, sed solum propter iustitiam & ordinationem culpæ: pœnas verò quæ consistunt in priuatione non videbunt in essentia diuina.

### CXLIII.

Hæ damnatorum pœnæ erunt inæquales, & magis punietur vnus quam alius, & pœna damni, seu carentia diuinæ visionis, quæ erit maior in his, qui grauius deliquerunt, & pœna sensus seu ignis, vermis etiam seu remorsus conscientiæ, magis cruciabit vnum quam alium ita ordinante diuina

diuina voluntate, requirente iustitia, & de meritorum inæqualitate, in  
exte nſiua tamen pœna, omnes omninò erunt æquales.

## DE STATV ANIMÆ SEPARATÆ & beatorum.

### CXLIV.

**A**nima rationalis separata à corpore per corruptionem totius com-  
positi, potest extra corpus existere, intelligere, & moueri de loco  
ad locum, non tamen motu organico, quo mouet corpus dum est  
in ipso, sed motu inorganico, quo etiã mouebit corpus gloriosum post  
iudicium totum simul, & non vna parte mota, & alia quiescente.

### CXLV.

Anima etiam separata à corpore, potest intelligere illa, quæ sibi antè  
separationem fuerunt nota, concurrente ad talem intellectionem, intel-  
lectu & specie intelligibili, non quidè influxa à Deo, vel intelligentia, sed  
per modū naturalē acquisita, quæ etiã species remanet in intellectu, cessan-  
te omni actu intelligēdi, per modū habitus, quo ad rationē permanantiæ.

### CXLVI.

Poterit etiã anima separata, acquirere cognitionē alicuius prius igno-  
ri, & hoc tam intuitiuam, quàm abstractivam, concurrente ad intuitiuā  
obiecto in actuali existentia præsente, & intellectu; ad abstractivā verò,  
specie intelligibili, gerente vicem obiecti, & etiam intellectu.

### CXLVII.

Cum verò in anima separata sit eiusdem prorsus rationis memoria,  
atque in anima coniuncta, poterit anima separata, secundum illā memori-  
am, exire in actum, & recordari præteritorū, quæ nouerat vt coniuncta:  
est autem recordatio, cognitio seu cogitatio alicuius actus præteriti ipsi-  
us recordantis in quantum præteritus est.

### CXLVIII.

In parte sensitiua est ponenda memoria, & licet possent actus & ope-  
rationes animalium probabiliter saluari, non ponendo memoracionem



Propriè in eis, sed solum imaginatiuam cognitiuam obiecti, quod est præteritum licet non vt præteritum, tamen ea quæ videmus in actibus eorū, facilius saluantur ponendo in eis memoriam, & ideò ponenda est.

## CXLIX.

Memoria etiam propriè dicta & actus recordandi est ponendus in parte intellectiua, & perfectius quā in parte sensitua, quæ licet in anima coniuncta sit inseparabilis à memoria sensitua, in anima tamen separata erit sine ipsa, sicut & reminiscencia.

## CL.

Beati recordabuntur peccatorum, quæ aliquando comiserunt in hac vita, ex hoc tamen nulla in ipsis generabitur tristitia, quod proueniet vel à Deo suspendente & impediante, netalis peccatorum recordatio in beatis tristitiam pariat, vel propter contrariū excellens, & complens capacitatem passi, quod est gaudium de obiecto beatifico.

## CLI.

Beati naturaliter seu in genere proprio vident & cognoscunt orationes viatorum, cum vocales, tum etiā mentales, modò immoderata distantia non impediatur, & debita præsentia adsit, videndo autem orationes nostras pro nobis intercedunt & iuuant nos, non obstante beatitudinis statu, orant autem habitualiter pro omnibus electis, actualiter verò tantum pro illis, à quibus inuocantur,

## CLII.

Cognoscunt etiā beati orationes nostras, cognitione supernaturali, seu in verbo, hæc tamen cognitio, non est necessaria ex ratione beatitudinis, neq; regulariter in verbo, aut per reuelationem, quia tamen valde congruum est, quod beati sint coadiutores Dei in procuranda electorum salute; ideò communiter illis reuelat Deus orationes nostras, quibus eorū imploramus auxilium.

## DE IUDICIO, IVSTITIA, ET MISERICORDIA DEI,

## CLIII.

**I**udicium Vniuersale acceptum propriè pro sententia diuina publica & efficaci, de reddendo vniciq; iuxta opera sua, est possibile esse, & satis congruum

huius impassibilitatis, nō est carentia qualitātū mixti in corpore beati, sed est id, à quo impediuntur qualitates corruptiuz in sua actione corruptiua, & illud erit voluntas diuina, nōn coagens causæ secundæ corruptiuz.

## CLXXIV.

Erunt etiam corpora beatorum agilia, est autem agilitas habilitas in aliquo toto, ad promptē se mouendum secundū locum, ex perfectione virtutis motiuz, & congrua dispositione corporis proueniens. Huius agilitatis causa in corpore beato, non est aliquid supernaturale corpori beato, superadditū defluens ab anima in corpus, sed est intensio virtutis motiuz, & amotio impedimentorum in organis virtutis motiuz.

## CLXXV.

Fulgebunt quoq; beati sicut sol ratione claritatis, qua corpora ipsorum sunt exornanda à Deo, hæc autem claritas beatorum, quæ est resurgens quædam, manifesta & perspicua, non erit æqualis in omnibus beatis, sed secundū maiora vel minora merita, vnus erit clarior alio. Dicente Apostolo. Alia est claritas solis &c.

## CLXXVI.

Propter dotem subtilitatis, corpora beatorum erunt subtilia, ratione cuius locum non occupabunt, & ideò poterit esse corpus gloriosum simul, cum corpore non glorioso, pro arbitrio animæ beatæ: & hæc erit illius corporis perfectio, & beatitudo, quæ etiā quia iure debetur beato ex ordinatione ipsius Dei, vocatur dos.

## CLXXVII.

Non erit æqualis omnium electorum beatitudo, sed vnus magis beatificabitur alio. Ista verò inæqualitas, non est ex obiecto beatifico, neq; etiam ex ratione potentiæ passiuz absolute, sed causa illius prima erit voluntas diuina, quæ ita statuit & decreuit remunerare electos, causa verò secundaria voluntas beatorum charitate formata, quæ sicut in diuersis erit diuersa & inæqualis, ita diuerso & inæquali gaudebit præmio, quælibet tamen sua sorte erit summè contenta. Omnium verò beatorum est futurū par gaudiū extensiuè, & omnes regnabunt cum CHRISTO & Deo in æternum. Cui sit laus honor & gloria in sæcula sæculorum, Amen.



## PROBLEMAT A EX EODEM

quarto libro Sententiarum Docto-  
ris Subtil.

1. Vtrum sola fictio Baptismi, remittatur per poenitentiam.
2. Vtrum character sit forma absoluta, vel respectiua.
3. Vtrum substantia panis in transubstantiatione in Corpus Christi, annihiletur.
4. Vtrum macula quæ manet in peccatore transeunte actu peccati interiori & exteriori sit sola ordinatio ad poenam.
5. Vtrum ignis infernalis agat in corpora damnatorum actione intentionali tantum.
6. Vtrum in Deo sit vnica iustitia re & ratione.
7. Vtrum virtus motiua in corpore glorioso mouens corpus inorganicè secundum totum, sit distincta à virtute motiua organica

Ad laudem SS. Trinitatis & Beatissimæ V.  
Mariæ, ac Beatissimi Patris nostri Fran-  
cisci honorem.











